



## **Komunikadu Imprensa**

### **Munisipiu Lautem**

*7 Setembru 2015*

### **Komunidade Suku Serelau Munisipiu Lautem primeira-ves simu treinamentu no informasaun legal husi JSMP**

Iha loron 3 Setembru 2015, Judicial System Monitoring Programme (JSMP), liu husi unidade Peskizador Jurídiku hamutuk ho Unidade Relasaun Públiku kontinua hala'o atividade treinamentu ba Lider Komunitariu sira iha Suku Serelau Sub-distritu Lautem, Munisipiu Lautem.

Materia ne'ebé fasilitador sira hato'o maka hanesan direitu ema nian, kna'ar no kompetensia juís, prokurador, defensor públiku, advogado privadu no polisia inklui tipu krime sira no oinsa komunidade sira prosesa kazu krime tuir sistema justisa formal.

Total partisipante iha trenamentu hamutuk ema nain 43 kompostu husi feto nain 15 no mane nain 28. Partisipante sira ne'e mai husi estrutura suku, joventude nomós komunidade sira.

“Importante tebes atu kontinua habelar informasaun sira ne'e ba lideransa komunitariu sira ne'ebé iha area rurais, atu ajuda fasilita sira oinsa komprende katak krime sira ne'ebé involve krime violensia domestika tenki rezolve tuir dalan justisa formal nian”, dehan Diretór Ezekutivu JSMP, Luis Oliveira Sampaio.

Xefi Suku Serelau, Sr. Alarico da Costa ne'ebé reprezenta komunidade Suku Serelau iha nia abertura no inseramentu hato'o nia agradesementu wain ba JSMP tanba bele fahe informasaun importante hirak ne'e ba sira liu-liu ba lia nain sira oinsa atu komprende diak liu tan dalan atu asesu ba justisa formal nian.

Sr. da Costa hatutan katak treinamentu ida ne'e hanesan treinamentu dahuluk ba sira, no nia rekomena ba partisipante sira atu fo atensaun durante trenamentu nia laran atu nune'e bele komprende buat ruma hodi bele fahe no hatutan ba komunidade ne'ebé la partisipa.

Durante treinamentu, partisipantes sira hatudu antusiasmu no interese atu hatene klean liu kona-ba prosesu justisa formal liu hosi husu no hatan. Komunidade sira preukupadu tebes ba problema violensia domestika, violensia seksual hasoru menor no kazu amante. Tuir xefe suku nia

observasaun katak iha sira nia suku kazu amante potencialmente nu'udar fator kauzador hodi hamosu krime taa malu no oho malu iha sira nia comunidade.

JSMP hein katak ho informasaun sira ne'ebé JSMP hato'o atraves hosi atividade treinamentu ne'e bele hasae konsensia no koñesementu diak kona-ba funsionamentu sistema justisa formal.

Atividade treinamentu ida ne'e realiza tamba hetan suporta husi Embaixada Finlandia – Jakarta

Atu hetan tan informasaun kompletu favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone:3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl